
PWYLLGOR CRAFFU GWASANAETHAU 28.01.16

Yn bresennol:

Y Cynghorydd Beth Lawton (Cadeirydd)

Y Cynghorwyr: Aled Evans, Alwyn Gruffydd, Elin Walker Jones, Linda Ann Wyn Jones, Sion Wyn Jones, Eryl Jones-Williams, Gareth A. Roberts, Ann Williams, Eirwyn Williams, Hefin Williams ac R H Wyn Williams.

Swyddogion: Gareth James (Rheolwr Aelodau Cefnogi a Chraffu) a Glynda O'Brien (Swyddog Cefnogi Aelodau a Chraffu).

Hefyd yn bresennol:

Ar gyfer Eitemau 4,5 a 6 isod

Y Cynghorydd W. Gareth Roberts, Aelod Cabinet Oedolion a Iechyd
Aled Davies, Pennaeth Dros Dro Adran Oedolion, Iechyd a Llesiant

Ar gyfer Eitem 4 isod

Ioan Thomas, Aelod Cabinet Tai, Gofal Cwsmer, Llyfrgelloedd, Amddifadedd a Chydraddoldeb
Arwel Wyn Owen, Uwch Reolwr Tai
Elliwl Llyr, Rheolwr Tai Strategol

Ar gyfer Eitem 6 isod

Rhion Glyn, Uwch Swyddog Gweithredol

Ymddiheuriadau: Y Cynghorwyr Alan Jones Evans, E. Selwyn Griffiths, Siân Wyn Hughes, Dewi Owen, Peter Read, Mair Rowlands (Aelod Cabinet Plant a Phobl Ifanc), Neil Foden a David Healey (Undebau Athrawon) a Morwena Edwards (Cyfarwyddwr Corfforaethol)

1. CYHOEDDIADAU'R CADEIRYDD

- (a) Estynnwyd croeso i'r Cynghorydd Gareth A. Roberts i'w gyfarfod cyntaf o'r Pwyllgor Craffu hwn.
- (b) Dymunwyd gwellhad buan i Gadeirydd y Pwyllgor Craffu hwn, Y Cynghorydd Peter Read, ac edrychwyd ymlaen at ei weld yn ôl ymhlith yr Aelodau yn fuan.
- (c) Cyfeiriwyd at farwolaeth y cyn Cynghorydd Eddie Dogan a chydymdeimlwyd a'r teulu yn eu colled drist.

2. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

3. COFNODION

Llofnododd y Cadeirydd gofnodion cyfarfod o'r Pwyllgor hwn a gynhaliwyd ar 26 Tachwedd 2015.

Atgoffodd y Cynghorydd Alwyn Gruffydd am yr angen i'r Pennaeth Addysg gyflwyno adroddiad ysgrifenedig i'r Pwyllgor Craffu hwn yn deillio o'r cofnod yn y cyfarfod diwethaf dan y pennawd Materion Brys – Targed Arbedion Ysgolion.

4. STRATEGAETH LLETYA POBL HYN

(a) Cyflwynwyd adroddiad gan yr Aelod Cabinet Oedolion ac lechyd ynghyd a strategaeth drafft lletya pobl hŷn a thynnwyd sylw ganddo i brif flaenoriaethau'r strategaeth sef:

- Cefnogi unigolion i aros yn eu cartrefi cyn hired â phosib
- Canfod ardaloedd daearyddol penodol ble mae'n debygol y bydd galw uchel
- Sicrhau lletya addas i bobl hŷn
- Sicrhau bod pobl hŷn Gwynedd yn ymwybodol o'r opsiynau lletya sy'n bodoli o fewn y Sir a bod gwybodaeth hygyrch ar gael

(b) Cyfeiriodd yr Uwch Reolwr Tai at nod y strategaeth sy'n gosod cyfeiriad o ran anghenion y boblogaeth. Edrychwyd ar ardaloedd penodol a'r gwasanaeth sydd ar gael yn barod. Atgoffwyd y Pwyllgor o'r heriau a wyneba'r Cyngor ynghyd a'r twf yn y boblogaeth. Gwelir twf yn y boblogaeth 85+ gyda chanran uchel ohonynt yn byw ar ben eu hunan ac yn ddibynnol ar ofal cymdeithasol. Ymddengys os yw'r llety yn addas ar gyfer unigolion eu bod yn gallu aros yn eu cartrefi gyda'r gost yn llai i'r gwasanaeth.

Ystyriwyd tueddiadau ac fe welwyd bod diffyg darpariaeth mewn rhai ardaloedd yn enwedig y cymunedau arfordirol. Yn ogystal, nodwyd bod twf sylweddol yn y cleifion gyda dementia a bod hyn yn creu pryderon i'r dyfodol ac fe geisir cael cydbwysedd rhwng y ddarpariaeth sy'n bodoli a'r hyn fydd ei angen i'r dyfodol.

Adnabuwyd 8 ardal o safbwynt pwysau o ran y boblogaeth ac fe welwyd mewn rhai ardaloedd bod y boblogaeth yn hŷn, rhai pobl ifanc yn symud allan, a bod y patrwm mewnllifiad erbyn hyn yn weddol gyson. O safbwynt yr 8 ardal, ystyriwyd y math o ddarpariaeth fyddai'n briodol ac a fyddai'n cwrdd â'r angen yn llawn. Byddir yn edrych ar y rôl sector preswyl i'r dyfodol gan fod mwy o welyau preswyl / nyrsio na darpariaeth tai gwarchod.

(c) Nododd y Rheolwr Strategol Tai bod goblygiadau tymor hir ac ariannol i'r strategaeth ac y byddai'n rhaid ystyried partneriaeth gyda chymdeithas tai a fyddai yn ei dro yn ddibynnol ar grantiau, a.y.b.

(ch) Rhoddwyd cyfle i Aelodau graffu'r strategaeth ac fe amlygwyd y pwyntiau canlynol:

- Paham na all y Cyngor ystyried cofrestriad deul yn enwedig gan fod y Bwrdd lechyd / AGGCC yn gefnogol?
- Pryder ynglŷn â lleihad mewn nifer o welyau preswyl traddodiadol gyda'r gwelyau bellach wedi eu trosglwyddo i'r Bwrdd lechyd ac o ganlyniad nad oes lle i bobl leol ym Mlaenau Ffestiniog yn benodol, ac nad oes tir ar gael i sefydlu tai gwarchod ychwanegol yno ar gyfer anghenion y bobl leol.

- Pryder pan fo cartrefi preswyl preifat yn cau, bo'r cyfrifoldeb yn syrthio ar y Cyngor i gadw'r cartref yn agored hyd nes y gellir adleoli defnyddwyr y cartref
- Bod yr ardaloedd a bennir yn y strategaeth yn rhai sydd o dan bwysau enfawr gyda phobl yn symud i mewn iddynt i ymddeol ac oni ddylai'r strategaeth gyfeirio at gydnabyddiaeth ariannol i fedru ymdopi a'r sefyllfa
- Gwnaed cais am fanylion pellach o'r nifer o unigolion sydd dros 65+
- Siomedig nad oedd y cynllun gweithredu yn nodi amserlen a phwy sydd yn gyfrifol am y gweithrediadau
- Bod diffyg cyfeiriad o fewn y strategaeth ynglyn â maint gwelyau ysbytai a'r angen i gymryd ystyriaeth o hyn yn enwedig ar gyfer cleifion sydd yn dymuno aros gartref ac yn byw mewn tai hynafol mewn trefi megis Blaenau Ffestiniog lle nad oes modd ffitio gwely arbenigol ysbyty yn y tai ac o ganlyniad yn gorfodi pobl oedrannus i fynd i gartrefi neu ysbytai.

(d) Mewn ymateb i'r sylwadau uchod, esboniodd y Pennaeth Adran Oedolion, lechyd a Llesiant bod sefyllfa'r farchnad o ran cartrefi preswyl yn fregus iawn ac nad oedd hyn yn unigryw i Wynedd. Cadarnhawyd bod cartref preswyl wedi cau yn ddiweddar ond fe lwyddwyd i adleoli'r defnyddwyr mewn cydweithrediad agos â'r Bwrdd lechyd. Nododd bod costau cyflogau yn cael effaith ar hyfywdra rhai o'r cartrefi ond mae y broblem sylfaenol yw recriwtio nyrsys. O safbwynt cofrestriad deuol, eglurwyd bod trafodaethau ac ymchwil cychwynnol yn mynd rhagddynt gyda'r Bwrdd lechyd er mwyn ystyried y posibilrwydd o ddarparu cyfleusterau cofrestriad deuol. Bydd hyn yn cynnwys cael barn gyfreithiol o'r hyn y gellir ei gyflawni. Cadarnhawyd nad oedd modd rhoi ymateb buan ar hyn o bryd gan fod yn rhaid cael canfyddiadau cychwynnol y gwaith yn gyntaf o safbwynt deddfwriaeth, a.y.b.

(dd) Eglurwyd mewn ymateb i ymholiad pellach ynglyn a gwahaniaeth mewn taliadau i gartrefi preswyl, bod costau cartrefi yn amrywio ac yn ddibynnol ar gyflwr yr adeiladau, lleoliad a'r math o arbenigedd gofal / darpariaeth, a.y.b. Ar hyn o bryd, nodwyd bod gwaith yn mynd rhagddo ynglyn a ffioedd er sicrhau gwasanaeth cost effeithiol o ystyried yr hinsawdd ariannol sydd ohoni. Sicrhawyd y byddir yn darparu adroddiad pellach i gyfarfod paratoi nesaf y Pwyllgor Craffu gan wahodd swyddogion i'r cyfarfod i amlinellu prosesau gosod ffioedd cartrefi preswyl ynghyd a hyfywdra cartrefi gofal preifat yng Ngwynedd.

(e) Esboniwyd, mewn ymateb i ymholiad ynglyn a datrysiaid gwledig y byddai'n ofynnol efallai gwneud datrysiaid traddodiadol sef i wneud defnydd o ddarpariaeth sydd ar gael mewn ardal os nad oes lle i dai gofal ychwanegol.

(f) O safbwynt gwahaniaethu rhwng y nifer o ddefnyddwyr cynhenid o bobl hŷn a phobl sy'n dod o du allan y Sir yng nghartrefi preswyl, cadarnhaodd y Pennaeth Adran Oedolion, lechyd a Llesiant bod yr Adran yn ceisio cael y ffigyrau i'r Cynghorydd Aled Evans. Nodwyd ymhellach bod gan yr Adran ambell achos lle mae awdurdodau dros y ffin yn ariannu Cyflwynwyd y ddadl i'r Llywodraeth yn amlinellu y problemau mae symudiad pobl i Wynedd heb eu rhwydweithiau cefnogol ond yn anffodus cyfyngedig yw'r llwyddiant hyd yma.

(ff) Esboniodd yr Uwch Reolwr Tai bod y Cyngor wedi derbyn grant ar gyfer dau gynllun ac un ychwanegol ym Mhorthmadog ond nad oedd ymrwymiad tu hwnt i hyn. Byddai'n ofynnol ystyried opsiynau gwahanol megis cynllun gofal ychwanegol ysgafn sydd yn fodel rhwng gofal tai gwarchod a gofal tai ychwanegol. Ni cheir gofal 24awr o fewn y cynllun hwn. Gweithredir model o'r fath ynf Nghysgod y Gogarth, Conwy.

Penderfynwyd: Gofyn i'r Pennaeth Adran Oedolion, Iechyd a Llesiant

- (i) **Sicrhau bod y materion isod yn cael eu cynnwys o fewn y strategaeth lletya pobl hŷn:**
 - **Cydnabyddiaeth bod stoc o dai hynafol mewn rhai ardaloedd ac felly yn amhosib darparu gwelyau ysbyty yn y tai oherwydd maint penodedig i wely ysbyty a'r angen i ystyried opsiynau gwahanol yn yr ardaloedd hyn**
 - **Bod angen cydnabyddiaeth ariannol ychwanegol ar gyfer rhai ardaloedd i gyfarch y twf mewn nifer o bobl hŷn sydd wedi ymddeol i'r ardaloedd hyn a'r gost o ddarparu gwasanaethau iddynt.**
- (ii) **gyflwyno gwybodaeth ychwanegol i gyfarfod paratoi'r Pwyllgor Craffu hwn sydd i'w gynnal ar 23 Chwefror 2016 i gyfarch y materion canlynol**
 - **Ffioedd / costau a hyfywedd cartrefi preswyl preifat**
 - **Llenyddiaeth diweddar gan Brifysgol Bangor**
 - **Darpariaeth gofal ychwanegol ysgafn ("Extra Care Light")**

5. TROSOLWG PERFFORMIAD CYNGOR GWYNEDD 2015-16 (CHWARTER 2) - GOFAL

Cyflwynwyd adroddiad gan y Pennaeth Adran Oedolion, Iechyd a Llesiant yn ymateb i gwestiynau a godwyd gan Aelodau yn dilyn derbyn Adroddiad Trosolwg o berfformiad y Cyngor

Rhoddwyd cyfle i Aelodau ofyn cwestiynau ac fe ymatebwyd iddynt gan y Pennaeth Adran Oedolion, Iechyd a Llesiant fel a ganlyn:

(a) bod gofynion newydd mewn perthynas â dyletswyddau lles ond nad oedd dim byd pendant wedi ei dderbyn gan y Llywodraeth hyd yma. Bydd rhaid ymgymryd â'r dyletswyddau o fewn adnoddau presennol ac y byddai'n rhaid cydymffurfio a'r ail-strwythuro ehangach o fewn yr Adran. Hyderir y byddir yn penodi Rheolwr Llesiant o fewn y mis nesaf.

(b) mai oddeutu 20 o fyfyrwyr y flwyddyn sydd yn mynychu'r cwrs MA mewn Gwaith Cymdeithasol ym Mangor. Bu i'r Adran hysbysebu am staff yn ardal Meirionnydd yn ddiweddar ac roedd yr ymateb yn dda.

(c) Eglurwyd ar y bwriad o godi ymwybyddiaeth y cyhoedd o Her Gofal ac y byddir fel cam cyntaf yn arbrofi gyda Chyngor Tref ac yna yn ddibynnol ar yr ymateb gellir penderfynu ar raglen waith ehangach i gwrdd â grwpiau penodol. Nodwyd bod apêl i ymweld ag ardal Penllyn lle mae 5 o gynghorau Cymuned yn cydweithio a'i gilydd. Sicrhawyd y byddir yn codi ymwybyddiaeth Aelodau Lleol o'r ymweliadau arbrofol fel eu bod yn ymwybodol os oes unrhyw ymweliadau yn eu hardal.

(ch) addawyd y byddir yn cylchredeg ffigyrau i'r Cynghorydd Linda Ann Wyn Jones o'r nifer sydd ar restr aros y Gweithwyr Cymdeithasol

(g) Bod llawer iawn o waith ymchwil wedi ei wneud parthed llwybrau gyrfaoedd, ond bod llawer iawn o waith eto i'w gyflawni. Cydnabuwyd ei bod yn anodd recriwtio Gweithwyr Cymdeithasol a gweithwyr gofal mewn ardaloedd gwledig a bod rhai o'r darparwyr allanol yn recriwtio gweithwyr gofal o dramor. Fodd bynnag, sicrhawyd bod

llawer o ymdrech wedi cael ei wneud i gysylltu á'r Colegau Addysg Bellach i godi proffil o ran y cyfleoedd ond nad oedd gofal yn yrfa yn atyniadol o safbwynt y cyflog. Rhaid rhoi mwy o sylw i sicrhau bod unigolion yn adnabod y maes yn fuan a bod cyfleoedd i ddatblygu gyrfa ymhellach. Cadarnhawyd bod llawer iawn yn cael ei wneud ar lefel broffesiynol er mwyn datblygu unigolion yn eu gyrfa. Cydnabuwyd bod strwythurau hyfforddi rhai darparwyr allanol yn ymddangos yn gryfach nag eraill. Nodwyd efallai y dylai'r Cyngor ystyried gosod cymalau pendant mewn contractau er mwyn sicrhau elfen o fuddsoddiad i ddatblygu llwybrau gyrfa.

(dd) O safbwynt y toriadau bod y prif elfennau o ran effaith wedi cael eu cyflwyno a bod rhai ohonynt yn mynd i gael effaith ar y gwasanaeth megis effaith ar ymweliadau ac asesiadau amserol, a.y.b. ac yn golygu dewisiadau anodd. Fodd bynnag, o wneud yr ymdrech i gael gwared â gwastraff, hyderir y bydd yr effaith yn llai ar unigolion ond y byddir yn arafach o ran darparu'r gwasanaethau.

(h) Yng nghyswllt problemau recriwtio a chystadleuaeth gan ddarparwyr allanol, nodwyd tra'n derbyn ei fod yn gamp i gadw unigolion mewn swydd am gyfnod hir, ei bod yn haws i'r Cyngor gadw staff oherwydd amodau gwaith, pensiynau, a.y.b. Mynegodd aelod y dylid edrych ar ddulliau dychmygus blaengar i gadw staff megis cynllun les ceir.

(i) Mewn ymateb i sylw wnaed gan Aelod ynglyn ag adroddiad gan y Trydydd Sector, ynglyn ag ardrawiad cyflogau / taliadau gan awdurdodau lleol ar hyfywdra darparwyr, sicrhawyd y byddir yn anfon copi i Aelodau'r Pwyllgor Craffu hwn.

(j) Yn yr un modd, awgrymwyd y dylid anfon copi o adroddiad Llwybr Gyrfa Gofalwyr iddynt yn ogystal.

(ng) O safbwynt cofrestriad deuol, ategwyd bod y gwaith comisiynu yn mynd rhagddo a rhagwelir y byddir yn ei gwblhau oddeutu mis Ebrill ac y byddai modd cyflwyno adroddiad pellach i'r Pwyllgor Craffu ar y modelau posib wedi hynny. Os oes enghreifftiau o Gynghorau wedi ymgymryd á'r ddarpariaeth y byddir yn ei gynnwys o fewn yr ymchwiliad.

Penderfynwyd: (a) Derbyn a nodi'r adroddiad.

(c) Gofyn i'r Pennaeth Adran Oedolion, Iechyd a Llesiant gyflwyno adroddiad pellach i'r Pwyllgor Craffu hwn ar ganfyddiadau gwaith comisiwn ar "gofrestriad deuol".

(d) Gofyn i'r Rheolwr Cefnogi Aelodau – Craffu anfon y wybodaeth amlinellir yn (j) uchod i Aelodau'r Pwyllgor Craffu hwn.

6. RHAGLEN WAITH – ADRODDIAD GWERTHUSO PERFFORMIAD 2014/15 (AROLYGAETH GOFAL A GWASANAETHAU CYMDEITHASOL – AGGCC)

Cyflwynwyd Rhaglen Waith a luniwyd mewn ymateb i Adroddiad Gwerthuso Perfformiad 2014/15 yr Arolygaeth Gofal a Gwasanaethau Cymdeithasol.

Rhoddwyd cyfle i Aelodau graffu'r rhaglen waith ac fe amlygwyd y pwyntiau canlynol ganddynt ac fe ymatebwyd iddynt gan y swyddogion perthnasol:

(a) teimlwyd bod y materion dan sylw yn rhai a drafodwyd eisoes ac nad oedd cynnydd o ran amserlen

Eglurwyd bod y rhaglen waith yn ymateb yn benodol i'r hyn a ofynnir gan yr Arolygaeth. Derbyniwyd y sylw ei fod yn ymddangos bod arafwch dros y misoedd diwethaf ond roedd hyn am resymau penodol a'r ffaith bod staff yn gorfod edrych ar ffurf eraill o weithio.

Ategodd Aelod bod 2/3 prosiect wedi bod yn araf ond roedd hyn yn ddibynnol ar benderfyniadau. Rhaid cofio bod llawer o'r newidiadau yn newid ymwneud â diwylliant i'r Adran ond byddir yn croesawu amserlen sy'n nodi dyddiadau penodol yn y cynllun gweithredu.

(b) Pam bod yr Arolygaeth yn mynd o amgylch mudiadau / unigolion ar hyn o bryd?

Eglurwyd bod yr Arolygaeth wedi dewis Gwynedd fel un o 6 awdurdod ar draws Cymru sydd yn derbyn archwiliad ar wasanaeth anabledau dysgu yn benodol a'u bod angen trafod hefo mudiadau / teuluoedd ac unigolion.

(b) Beth sydd wedi digwydd i drigolion Cartref Plas y Bryn, Bontnewydd?

Esboniwyd bod y Cyngor a'r Bwrdd Iechyd wedi trefnu i adleoli trigolion cartref Plas y Bryn i wardiau penodol mewn ysbytai ac i leoliadau ar draws Gogledd Cymru yn ddibynnol ar y gofal roeddynt angen. Yn ogystal roedd rhai wedi symud i gartref Bryn Seiont Newydd. Mewn ymateb bellach i sylw ynglyn a ffioedd Bryn Seiont, bod gwaith negodi wedi digwydd rhwng y Cyngor, y Bwrdd Iechyd a'r cartref ynglyn a ffi safonol am unigolion sydd yn cael eu lleoli yno.

(ch) Bod y sefyllfa o gau Cartref Bryn Llifon yn broses wahanol ac yn ymwneud a hyfywdra ariannol a phroblem recriwtio staff.

(d) O safbwynt morâl staff yr Adran, cadarnhaodd y Pennaeth ei fod o'r farn ei fod yn isel ond rhaid cofio bod yr Adran yn mynd drwy newidiadau sylweddol o ran diwylliant, ffurf a phrosesau gwaith gyda'r ail-strwythuro yn creu ansicrwydd i staff. Hyderir, unwaith y bydd eglurder o'r newidiadau, y byddir yn gallu symud ymlaen ac y bydd morâl yn gwella. O ran amserlen ac o gofio bod y newidiadau ar raddfa sylweddol, rhagwelir y byddai'r sefyllfa yn cymryd oddeutu 12-15 mis i setlo.

(dd) awgrymir y byddai'n fanteisiol i enwebu 2 neu 3 aelod o blith y Pwyllgor Craffu hwn i gynorthwyo gyda llunio briff i'r cynllun strategol o safbwynt trefniadau cymorth i ofalwyr.

(e) Pwysigrwydd i gadw golwg a rhoi sylw i gefnogi gofalwyr ac o gofio bod rhai ohonynt yn blant ysgol yn enwedig pan fo unigolion yn cael eu hanfon o ysbytai heb dderbyn asesiad.

(f) Mynegwyd pryder gan aelodau, o ystyried y toriadau arfaethedig, na fyddai'r Adran yn gallu ymdopi a holl ofynion y Ddeddf Llesiant ac y byddai'r Cyngor yn cael ei roi mewn sefyllfa o fesurau arbennig.

Mewn ymateb, esboniwyd bod arbedion effeithlonrwydd y gellid ei gyflawni o fewn yr Adran a chydabuwyd bod gwastraff o fewn rhai systemau ymhob gwasanaeth. Fodd bynnag, nodwyd bod y toriadau arfaethedig yn ychwanegol ar ben yr arbedion effeithlonrwydd ac wrth gwrs yn golygu y byddir yn gorfod lleihau rhai gwasanaethau. Pwysleisiwyd y byddir yn ceisio sicrhau bod unrhyw doriad yn cael cyn lleied o effaith ar drigolion Gwynedd ag sydd bosib.

(ff) Cyfeiriwyd at bwynt 4.2 lle nodir y bydd y ddau Aelod Cabinet yn allweddol i sicrhau llwyddiant y rhaglenni moderneiddio a gofynnwyd beth fyddai rôl y Pwyllgor Craffu yn hyn o beth.

Eglurwyd bod yr holl Aelodau yn rhan o'r rhaglen o newidiadau sydd ar y gweill o ran arbedion a thoriadau a gofynion Deddf Gwasanaethau Cymdeithasol a Llesiant a bod yr Aelod Cabinet Oedolion, lechyd a Llesiant yn gwneud pob ymdrech i sicrhau bod y gwaith yn cael ei gyflawni. Yn ogystal, nodwyd pwysigrwydd i rôl y craffwyr a bod yn digwydd mewn mwy nag un ffordd boed hyn gan aelodau'r Pwyllgor Craffu hwn, y Cyfarwyddwr Corfforaethol ac Arolygaeth Gofal a Gwasanaethau Cymdeithasol i sicrhau bod yr Adran yn mynd i'r cyfeiriad cywir.

Penderfynwyd: (a) Derbyn a nodi'r rhaglen gwaith yn ddarostyngedig i dderbyn amserlen gadarn ar gyfer gweithredu i'w gyflwyno i gyfarfod paratoi'r Pwyllgor Craffu hwn ar 23 Chwefror 2016.

(b) Enwebu'r aelodau canlynol i gynorthwyo'r swyddogion perthnasol a'r Aelod Cabinet Oedolion, lechyd a Llesiant mewn llunio briff ar gyfer y cynllun strategol mewn perthynas â chymorth i ofalwyr:

**Y Cyngorydd Linda Ann Wyn Jones
Y Cyngorydd R H Wyn Williams**

7. PANEL RHIANT CORFFORAETHOL

Penderfynwyd: Ethol y Cyngorydd Siân Wyn Hughes i wasanaethu ar y Panel Rhiant Corfforaethol i olynu'r Cyngorydd Elin Walker Jones yn dilyn ei ymddiswyddiad diweddar o'r Panel.

Dechreuodd y cyfarfod am 10.00 a.m. a daeth i ben am 12.00 o'r gloch

CADEIRYDD.